

## 108學年度龜山國中語文競賽客語朗讀文章

編號1號（詔安腔）

### 【長年菜】徐姿華原作

佢做細子個時，阿媽身體猶真勇，佢真打拚，會在屋脣、屋背掘菜園來種菜，照節氣來種青菜，蔥、葫、茄、蕓菜、韭菜、角子菜、紅菜、白菜、蕪菁、苦瓜逐件有，普通時三頓个青菜即對這來。寒天時，阿媽即會種芥菜和菜頭，青溜溜个芥菜裁落來會用萋萋煮來食，嘛會用滷鹽加工做鹹菜、做覆菜，抑係炙梅干菜。阿媽總會留幾下頭芥菜過年好用，討入年假啊，即拗菜頭擲轉來炊菜頭叛，和芥菜剝轉來燜長年菜。

逐年三十暗夜食團圓飯个時，桌嶼定著有燜筍乾和長年菜，燜好个筍乾金黃金黃，摻落共下燜到綿酪酪个菜頭和鹹菜，香香脆脆个筍乾合酸濂酸濂个鹹菜和菜頭，好食到舌硬硬討吞落去。長年菜嘛燜到綿綿香香，食起來猶有一兜仔苦甘苦甘个味，阿依總係用爌好頭牲个油湯來燜筍乾和長年菜，筍乾比長年菜較澀，愛油臊，用油湯來燜頭堵好。遐兩鑊大嫲鑊个筍乾和長年菜，對三十夜食到初五隔開，暖燒攔暖燒，逐頓都上桌。

細漢時个佢真感食長年菜，嫌佢菜色黃黃又苦篤苦篤，一兜仔

都毋會錫人食。躉膽个佢識問佢依講：「遐菜恁歹食，做麼个討煮恁大鑊？又無人愛食。」佢依應佢講：「細子人毋好烏白講事！這係『長年菜』， 僇過年生成愛食『長年菜』，屋下人正會長長久久、長命百歲。『長年菜』有人講係本來農業社會，農家个長工會趁收好尾冬禾了後，拗頭家曠地來種芥菜，收成个時務堵好係寒天，賣得別儕，加趁一兜仔錢好過年。因為係長工歸年做工，又加額種个菜，即喊做『長年菜』，這『長年菜』嘛表示長壽、艱難頭快活尾，過年時務家家屋屋做一下會食這『長年菜』，希望會用長命百歲。」聽著阿依恁講，不得已佢正刻耐食這長年菜。

到大漢啊，佢去到外頭讀書、食頭路，逐年歇寒轉屋下過年，團圓飯桌嶼共款有燜到油光油光、金黃金黃个筍乾和香香綿綿个長年菜，應當係佢既然知這菜代表个意思，猶有回鄉遊子个心情，伴隨爺母个笑容，團圓飯个筍乾食來特別脆，長年菜嘛少一兜苦味，正伸甘味定。

## 108學年度龜山國中語文競賽客語朗讀文章

編號2號（詔安腔）

### 【躉狗想討食豬肝骨】張美容原作

前幾下日去市場打豬肉，豬砵个頭家睺係買真多款部分个肉，即真煞著割一坵豬肝送係。足久毋識食豬肝啊！係暢壞壞攞豬肝轉到屋下，後生一睺著即講：「豬肝係豬解毒个器官，豬食个飼料可能有生長激素、瘦肉精，頭好毋好食。」新婦續落又講：「有年歲个人啊，腹內毋會用食忒多。」你一句，佢一句，講到係毋知討拗這坵豬肝擊莫好抑係煮來食好。

記得係細漢時務，逐儕毋係日日有肉好食，係依久久會準備一、兩件私伽菜得係媽和係公食，毋係豬肝湯，即係瘦肉湯。第一擺睺著桌嶼个豬肝湯，一坵一坵个豬肝足錫人个！係和阿弟、阿妹毋知天地，相爭討挾來食，係依隨即喝係人講：「恁無規矩，躉狗想討食豬肝骨共款！」細子人普通想討食豬肝，即係像躉狗想討食豬肝骨共款。係媽惜孫，會挾幾下坵分孫子、孫女食，佢頭惜係，總會偷偷挾幾下坵在係碗底。對遐時起，豬肝在係心肝內係頭高貴个食物。

無想著以後，「躉狗想討食豬肝骨」這句事，恬恬在係耳空脣

鳴。因為自細漢係媽即惜係、容係，愛麼个即有麼个，毋識失望過。到係媽過身了後，即無恁好空啊，尤其係頭大，下腳有五個阿弟、阿妹目珠金金睺，係依對係个要求，總係用「躉狗想討食豬肝骨」來應係。毋使講「豬肝骨」這種無个物件，即和豬肝嘛高級上等，閒時白務嘛難食著，所以係依應係這句事，代表係係躉想啦！毋過，係逐擺猶係「鴨嫲嘴罔絡」，希望有一、兩擺會合意。唉！遐願豬肝个日子啊！

成過無恁豐沛个年代，豬肝會用補血，係足有營養个食物，這滿个人山珍海味食多，營養過頭，無麼个人愛食啊！自然豬肝个價數即加真便宜，幾下十箍即買一大坵，猶捷捷得店頭家提來割送主顧用。係想若係有「豬肝骨」，無定著好命个狗嘛無愛食啊！睺桌嶼个豬肝，想著成過个種種，煮來食好啦，順續拗係對係媽个思念共下吞落肚。